

I yu'xarij ti hua'puaj i ti jo'yú'xaca' a'íjna i San Pablo a'íjma jimi i maj Corinto já'ma'can

Pablo pu hua'tyojtye'

¹ Nyáaj i nyaj Pablo pué'een, nyáaj nu síj a'ín pué'een i nyaj jahuiire' i Ciriistu', a'íjci jime' ti i Dios juxié'vi'ra' jime' a'yan tyinaatá', a'íjna jamuán i ta'ihuáara' i Timoteo, a'yaa tu já'muatyojtye' mu siaj jusi'rii i Dios jimi, mu siaj Corinto jo'cháatimee, tyajta néijmi'caa i maj Acaya jo'cháatimee.

² Che' i Dios i tyaj jajvástara', ajta a'íjna i tavástara' Jesús ti ajta Ciriistu' pué'een, miche' a'ín tyámua' tyajamuaatá'an, majta jamuaatyápua'ritye'en.

I Pablo ti jin tyé'tyojtzire'

³ Tyiche' tyámua' tya'tá'care'en i Dios ti ajta yo'puáara'an pué'een i tavástara' Jesús ti ajta Ciriistu' pué'een, a'íi pu a'ín pué'een i tyaj jajvástara' i ti tá'cu'vej, ajta a'ín pué'een i Dios i ti a'náj tina'aj tyámua' tyitacájee.

⁴ A'íi pu tyámua' tyitacájee néijmi'i jime' je'ej tyaj tya'ajpuéjtzij, tyata'aj tyij tyajta ityáj tyámua' tyihuo'tyéjeevej a'íjma i maj j-ajpuéjtzij, a'yájna ti'ij a'ín tyámua' tyitaatyéeje ityájma.

⁵ Ji'nye a'yájna tí'ij i Círíistu' tyaa-puéjtzitariaca' tajíme', a'yaa tu'uj tátyana'aj ityáj tya'ajpuéjtzij, a'yaa pu cha'tána'aj ij Círíistu' jimi tyajá'ma'can i tyaj jin huátatyamua've'en.

⁶ Tipua'aj ityáj tyajpuéjtzij, a'yaa pu tyí'huüre' tí'ij Dios tyámua' tyajamuaatyéjeevej, ajta ja'mua japua huatányuunyij, ajta tipua'aj Dios tyámua' tyitaatyéjeevej, a'yaa pu ajta tyí'huüre' tí'ij ajta a'ín tyámua' tyajamuaatyéjeevej, ajta siaj sij tyo'táviicue' i siaj jin jajpuéjtzij tyatí'ij ityáj tya'ajpuéjtzij.

⁷ A'yaa tu tyámua' naa tyi'ijchó've' ja'mua jimi, ji'nye a'yaa tu tyá'mua'reej tíjin a'yájna siatí'ij tya'ajpuéjtzij, a'yaa pu ajta tyajá'muaci'tyij siaj sij huatóotyamua've'en.

⁸ Nye'ihuáamua', a'yaa tu tyá'xie've' siaj jáamua'reej je'ej tyej tyaapuéjtzitariaca' tyatí'ij a'áa jo'tyá'ca'aj a'ájna a Asia. Huápuí'ij tu jajpuéjtzica'aj catu che' tyé'viicue'raca'aj, a'yaa pu tyitá'miteerastya'ca'aj cuxáa tyej quee che' tyo'táviicue'raj.

⁹ A'yaa pu ta'axcaa cuxáa tyacui'nyij. A'yaa pu'ij tyitaatyáhuü tyej tyij jáari'rej tyaj quee tajitzé tyí'ca'nyej, sulu tyej tyij a'ájna jitze arátaca'nyej i Dios tí hua' juuritye' i maj meríj huácuíj.

¹⁰ Ajta i Dios pu tíi'rájtoo tí'ij quee a'yan tyitáaci'tyij tyaj a'áj jin huá'cui'nyij tí huápuí'ij je'ej pua'aj een. A'áj tu jitze tyí'ca'nyej tí a'ín tíi'rátoosij,

¹¹ tipua'aj mua'aj siataatáhuüre' a'yan

setya'huooj tajíme'. Tìpua'aj mue'tíj a'yan metyá'huooaj tajíme', mue'tíj mu majta tyaatatyójtzi're'ej i Dios i ti a'ín tyámua' tyitatá'caa.

Ji'nye een jime' i Pablo quee aja'tanyéj a Corinto

¹² Tyi'tíj tu jin á'tatzaahuatye', ji'nye a'íjna i tyaj jin ma'umuámua're' a'yaa pu tyí'ta'ixaatye' tíjin tyámua' tu tyi'tyítacha'ij tzáahuatyi'ra'aj jime' íyan cháanacaj japua, tyajta jéetze' tyámua' tyi'tyítacha'ij ja'mua jimi. Catu ityáj a'íjna jitze tyí'ta'itíi je'ej maj i tyeítýee metyityoomuámua're', sulu a'íj tu jitze tyí'ca'nyej i ti jin i Dios tyámua' tyitatá'caa.

¹³ Ajta i tyaj tyajá'muayu'se'ej, a'íi pu'uj pué'een i siaj seríj jaayí'tin siaj jo'jíjve'en, ajta i siaj yo'itéej xá'ra'nyij. A'yaa nu tyá'xie've' siaj néijmi'i tyámua' naa tyojo'itéej xá'ra'nyij,

¹⁴ a'yájna siati'ij seríj je'cácaa tyí'mua'reej a'tyán tyaj pué'een, ajta ti'ij uvé'nyej i tavástara' mua'aj xu tajíme' ootzáahuatye'ej xá'ju'un, a'yájna tyati'ij tyajta ityáj tya'tatzáahuatye'ej tá'ju'un ja'mua jime'.

¹⁵ A'íj nu jitze tyi'ca'nyáaj, a'yan nyetyu'mua'aj nyaj anaquéej a'áa ja'tanyéj ja'mua jimi, nyej nyij hua'puaj jamuáamuaarej,

¹⁶ a'yaa nu tyí'mua'ajcaa nyaj jamuáamuaarej nyati'ij a'áa jó'me'en a Macedonia, ajta nyati'ij a'áa pu ja'ajvetyij nyajtáhua'aj nu já'muamuaaren. A'yaa pu'ij tyí'rij siaj mua'aj naatáhuire'en nyej nyij nyooj huame'en a'ájna a Judea.

17 ¿Nyiquij nyequee tzáahuatyi'ra'aj jin a'yan tyu'muá'aj? ¿Nyij a'yan setyi'mua'tzej nyaj a'yan tya'tányarasij a'yan nyetyi'mua'astij nyaj a'yan rinyij, nyajta a'yan nyajta tyi'mua'astij nyej quee a'yan huárinyij?

18 Dios pu a'yan tyá'mua'reej tyaj quee a'yan tyajá'mua'ixaatye' yee “jee” tyajta je'en a'yan yee “capu” a'aj cha'taj tyana'aj.

19 Ji'nye a'ijna i Ciríistu' ti yójra' pué'een i Dios, a'ijna i nyaj jaxaj ja'mua jimi nyaj jamuán a'ijna i Silvano, ajta i Timoteo, capu a'yan tyu'taxájtaca' yee “jee” ajta je'en a'yan yee “capu”. Dios pu a'yan tyu'taxájtaca' i Ciríistu' jimi jusén jime' tijin “jee”,

20 ji'nye a'ij pu jimi i néijmi'i a'yan atyojo're'nyinyii je'ej ti i Dios tyi'tij jin tya'tóoratziiri'. A'ij tu jin tyati'ijta tyé'tyojtzi're'ej i Dios a'yaa tu tyi'xaj tijin: “Che' a'yan tyá'ra'nyij”, a'ijna jitze ma'can i Ciríistu'.

21 Ajta i Dios pu a'ijn pué'een i ti tyámua' tyitájcha'ij ityájma, ajta mua'ajmaj i Ciríistu' jimi.

22 A'ii pu ityájma huatyóa'rij ajta tajimí jaatyájtoo i ju júuricamej tyej tyij jáamua'reej ti a'ijn tyámua' tyitaatyátoosij.

23 Ajta tyij nyequee xu a'áa ja'tanyéj a Corinto, a'yájna nyati'ij tyi'mua'ajcaj, Dios pu jamua'reej nyej quee tyi'hue'ej, nyajta a'yan tyi'xaj tzáahuatyi'ra'aj jime', nyaj quee a'áa ja'tanyéj ja'mua jimi nyej nyij quee jamuaata-muárie'riste'en.

24 Catu ityáj a'yan tyajá'mua'ijtye' siaj sij

ca'nyéjrij jin tyá'antzaahuatye'en, sulu ja'mua jamuán tu tyí'muarie' siaj sij a'íjna jin huatóotyamua've'en, ji'nye mua'aj xu tyámua' een i siaj jitzán tyá'tzaahuatye'.

2

¹ A'íj nu jin quee jamuáamuaariaca' nyej nyij nyajtáhua'aj xaamuíjrira'aj jamuaata'an.

² Ji'nye tìpua'aj nyaja'muaxamuijritya'aj, ¿a'tyanquíj mana'aj a'íin pue'éenye'ej muá'ju'un i maj naatatyámua'viste'ej? Ji'nye mua'aj xu a'íin pué'een i nyaj jamuaatáxaamuijrityej.

³ A'yaa nu een jime' tyajamuaatayú'sej, ji'nye canu a'yan tyá'xie've' siaj sij naatáxamuijritye', sulu siata'aj natatyámua'viste'en. A'yaa nu tyámua' tyá'tzaahuatya'ca'aj siaj néijmi'i mua'aj siajta a'íjna jin huatóotyamua've'sij i nyaj jin nyetyamua've',

⁴ ajta nyati'ij tyajamuaatayú'sej, jéehua pu je'ej pua'aj nya'axcaj, nyajta acanyeyi'nya'aj. Nyajta quee a'íjna jin tyajamuaatayú'sej nyej nyij jamuaatáxaamuijritye'en, sulu siaj sij jáamua'reej nyaj jéehua huápu'i'ij já'muaxie've'.

Pablo pu tyaatú'uunyi'ri' a'íjci i ti jimi ootyá'itzee

⁵ Tìpua'aj a'tíj tyi'tíj je'ej huá'uurej tí'ij síj huatóoxaamujritye'en, capu nyéetzij na'aj naatáxaamuijritye'sij, sulu mua'ajmaj pu ajta jamuaatáxaamuijritye'sij. A'yaa nu tyajá'mua'ixaatye' nyej nyij quee jéehua jamuaatamuárie'riste'en.

6 A'íi pu'uj i siaj seríj mue'tíj puéjtzij jaatá a'íjci i a'tíj.

7 Ajta ijíj a'yaa pu tyúuxie've' siaj tyaatú'uunyi' siajta jaatáhuire'en, na'ríj quee a'íi pu mue'tiche'en a'íjci jime' ti jéehua juxaamuijritye'.

8 A'íj nu jin jéehua já'muahuavii siaj siajtáhua'aj a'yan tyaataséejratye'en siaj siooj jaxie've'.

9 A'yaa nu nyeríj anaquéj tyajamuaatayú'sej, nyej nyij jamuatyéesej nyajta je'en jáamua'reej tipua'aj néijmi'i setyá'astyaj i nyaj tyajá'mua'itíj.

10 A'yaa pu'ij a'íjna i siaj mua'aj tyaatú'uunyi'ri', nyáaj nu nyajta tyaatú'uunyi'raj. Tipua'aj a'yan tyi'tíj jin nyetyaatú'uunyi', a'yaa nu een jime' tyaatú'uunyi'raj nyej nyij ja'mua japua huatánuunyi i Ciriistu' jimi.

11 Ti'ij quee i tyiyáaru' tyi'tíj jin ta'antymué'tin, ji'nye tyámua' tu naa tyá'mua'reej je'ej ti éenye'que' tyi'muarie'.

I ti jin je'ej pua'aj ja'axcaa a'íjci i Pablo ti'ij a'áa jo'tyávaaca'aj a Troas

12 Nyati'ij a'áa ja'rá'aj a chájta' ti a'yan tyaja'rájtyapua jijn Troas, nyej nyij a'áa huó'ixaatye'en i nyúucaria'ra' i Ciriistu', nyavástara' pu a'yan tyinaatá' nyej nyij nyaxáahuaj tyihuó'ixaatye'en i tyeítýee.

13 Ajta jéehua nu tyí'mua'ajcaa a'íjci jime' nyej quee jáatyoj i nye'ihuáara' Tito. A'íj nu jin huo'tatyóotya'aj nyati'ij nyij a'áa jo'mej a Macedonia.

I tyaj jin tyaatatyójtzi're'en i Dios

14 Tyámua' tu tyaatatyójtzi'rej i Dios ti a'yan tyitatá'caa tyaj tyu'tyámue'tin jamuán i Ciriistu', ajta ityájma jime' pu jaxajta i junyúucaa, a'íjna i ti néijmi'que' naa curiá'rie'.

15 Ji'nye ityáj tu a'yan een ti'ij i ti naa curiá'rie' i Ciriistu' ti'ij i Dios jimi tyu'tátuiire'ej, a'yaa tu cha'taj tyana'aj een hua' jimi i Dios ti hui'rátosij, tyajta hua' jimi i maj jó'vesij.

16 A'íimaj jimi i maj jó'vesij, a'yaa pu huá'rie'catye' ti'ij tyi'tíj ti huamuí', ajta a'íimaj jimi i Dios ti hui'rátosij, a'yaa pu huá'rie'catye' ti'ij tyi'tíj ti júurij ti naa tyaarie'ej ti ajta huo'tá'sij mej mij júurij muá'ra'nyij. ¿A'tanyíj jaayí'tin ti'ij a'íjna jin tyu'tyáhuire'en?

17 Catu ityáj jatyátoonyij i nyúucaria'ra' i Dios, mati'ij i séecan ricij, sulu tzáahuatyí'ra'aj tu jin tyí'xaj i Dios jimi, a'yaa tu i Dios jimi tyí'xaj ti'ij síij ti Ciriistu' jitze ma'can tyí'huire'.

3

A'íjna i nyúucarij ti jájcuaj i ti jin i Dios tya'tóoratziiri'

1 Tyati'ijta a'yan tyí'xajtaj, ¿nyiquij a'yan jamua'séjratye' tyej tyajtáhua'aj huatyátahuij tyej tyij tajímua'aj tyámua' tyi'huátaxaj? Na'riij, ¿nyiquij a'yan tyúuxie've' tyaj jo'tyeyú'xan tyej tyij jamuaataséjratye'en, nusu tyaj jamuaatáhuavij sij mua'aj jo'tyéeyu'xaj i sij jitzán tyámua' tyí'taxaj ityájma, mati'ij i séecan ricij?

2 Mua'aj xu a'íin pué'een i siaj a'yan tyí'huüre' ti'ij yu'xarij i tyaj jin huatátasejrataj, yu'xarij xu pué'een siaj á'yu'si'ij i taxiéjnyu'caa jitze i maj néijmi'i jamua'tyej majta jaayí'tin maj jo'jívve'en.

3 Tyámua' pu naa tyí'sejre' siaj mua'aj a'íin pué'een i yu'xarij ti Ciríistu' jimi jo've'mej ityáj tyej tyij yajavá'toj, ajta capu a'táj na'aj jo'yú'xaca', sulu a'íj pu jin ooyú'si'huaca' i júuricama'ra' i Dios, ajta i yu'xarij capu tyetyéj jitze ooyú'si'huaca', sulu a'íi pu jaatyájtoo ja'mua xiéjnyu'caa tzajta'.

4 I Ciríistu' jitze ma'can tu Dios jitze tyí'ca'nyej, a'yaa tutyij tyámua' tyá'tzaahuatye'.

5 Capu a'yan tye'tyévijtye' tyaj tajímua'aj tyu'taxáj yee tajimí pu ma'can, sulu a'íjna i tyaj jitzán arátaca'nyej, Dios pu jimi jo've'mej,

6 ji'nye a'íi pu ta'antyíhuo tyej tyij a'íjna jimi tyu'tyáhuüre'en i nyúucarij ti jájcuaj ti Dios ajta jin tya'tóoratziiri', i tíquee a'íjna jitze aróoca'nyej i yu'xarij i maj jin tyí'ijta, sulu a'íjna jitze i júuricama'ra' i Dios. A'íjna i nyúucarij i maj jin tyí'ijta tyi'tá'caa maj a'táj ooxíjtye'en majta je'en jaajé'caj, ajta i júuricama'ra' i Dios júuricamej pu tyu'tá'caa.

7 Ajta i nyúucarij i maj jin a'táj ooxíjtye'en ti'ij a'íin huámui'nyij, a'yaa pu tyé'yu'si'huaca'aj i tyetyéj jitze, huápu'íj pu naa huasé'rihua'aj ti'ij i Dios jaatyájtoo a'íjci jimi i Moisés, majta a'íimaj i maj Israel jitze ajtyáma'can, capu huái'riitya'ca'aj maj ja'ráasej i Moisés, ji'nye huápu'íj pu tyátatzarisima'aj i nyéerima'ra', ajta a'yan tyu'tyátuihuaca' ti'ij oopua'rej,

8 ajta i ti jin tyí'huiire' i júuricama'ra' i Dios, jéetze' pu huápu'i'ij naa huasé'rihua'aj ja'mej.

9 A'yaa pu'ij, tipua'aj jéehua huápu'i'ij naa huataséjre ti'ij i Dios jaatyájtoo i nyúucarij i maj jin a'tíj ooxíjtye'en, jéetze' pu huápu'i'ij naa huasé'rihua'aj ja'mej a'íjna i nyúucarij ti tyi'tá'caa ti a'tíj ji'réenya'aj huatyá'itzeere'en i Dios jimi.

10 Ji'nye a'íjna i ti anaquéej huápu'i'ij naa huasé'rihua'aj, capu che' naa huasé'rin a'íjna jime' ti arí s'íj huataséjre ti jéetze' huápu'i'ij naa huasé'rin.

11 Ajta tipua'aj naa éenye'ej huataséjre a'íjna i ti á'pua'ren, jéetze' pu huápu'i'ij naa huasé'rihua'aj ja'mej a'íjna i ti jusén jime' séeria'aj ja'mej.

12 Ji'nye tu'ríj jacho've' i Dios jimi ti a'yan atyojo're'nyej, a'íj tu jin quee tyí'tziinye'ej tyety-ihuá'ixaatyé'.

13 Catu a'yan ricij ti'ij i Moisés ti i cíxurij jin aróonaj i junyéerimij jitze mej mij quee ja'ráasej a'íimaj i maj Israel jitze ajtyáma'can a'íjna i ti tyápua'risime'ej.

14 Majta a'íimaj camu jaataxié'vej maj yo'itéej muá'ra'nyij, majta móoche' a'yan ricij, mati'ij jo'jívvej a'íjna i nyúucarij ti mí'ma'can, óoche' pu a'yan huasé'rin cuxáa mua'ranámi'huajmee, ajta ti'quee eexúj a'tíj huo'táxiixi, ji'nye a'íj pu jitze ma'can i Ciríistu' je'ej tyí'riij.

15 A'yaa pu'uj na'aj tyí'een ijíj, mati'ijta jo'jívve'en a'íjci i Moisés ti jo'yú'xaca', móoche' mu aranámi'huajmee mej mij quee yo'itéej

muá'ra'nyij.

¹⁶ Ajta tipua'aj a'tíj tyá'antzaahuatye'en i tavástara' jîmi, Dios pu jo'táxistaj i ti jin aránami'.

¹⁷ Ji'nye i tavástara' pu a'íin pué'een i júuricama'ra' i Dios, ajta jo'tíj já'sejre' i júuricama'ra' i tavástara', a'áa pu jáai'rij ti a'tíj juxáahuaj jo'cha'canye'en.

¹⁸ A'íj pu jin, néijmi'i ityáj catu che' aranámi'huajmee, a'yaa tutyij tyí'tasejrataj tí'ij i tavástara' tyámua' naa tyúusejrataj, ityáj tu seequéj huatyáta'uuresij tyej tyij a'yan huasé'rihua'aj tá'ra'nyij tí'ij tyévira' i tavástara', ji'nye jéetze' tu naa huasé'rihua'aj tá'ju'un tí'ij na'aj yutíj jo'que'tíj ja'mej, a'yaa pu tyí'muarie' i tavástara', a'íjna jîme' i ju júuricamej.

4

¹ A'íj tu jin quee tyátaxa'huataj, ji'nye i Dios, a'íjna jîme' i ti jin tá'ancu'vaxi', a'íi pu taa'íjcaj a'íjci i muárie'rij.

² Tu'ríj ityáj jaatáxaahuataca' i tyaj avíitzij jin je'ej pua'aj rijcaj, a'íjna jîme' i ti tyú'tyevi'raste', catu á'taca'nyej tyej tyí'tíj jin tyu'hué'taj, catu tyajta á'taca'nyej tyaj seequéj tyaataxáj a'íjci i nyúucaria'ra' i Dios. Sulu a'yaa tu jé'yacan jin tyí'xaj tzáahuatyira'aj jîme', a'yaa tu a'íjna jin tyí'tasejrataj hua' jîmi i tyeítyee ti a'yan tyí'ja'yájna i Dios jîmi.

³ Ajta tipua'aj i nyúucarij i tyaj huá'ixaatye' a'yan eenye' tí'ij i ti aránami', a'yaa pu'uj een a'íjma jîmi i maj á'pua'ren.

4 Majta a'íimaj camu tyá'tzaahuatye', ji'nye a'íjna i dios ti a'yan séejre' i cháanacaj japua, a'íi pu huo'tánamuaj mej mij quee tyojó'iteej, ajta mej mij quee jaaséj i tatzárij ti huá'tatzavi'tye' ti a'íin pué'een i nyúucaria'ra' i Ciriístu', a'íi pu ajta a'íin pué'een i ti a'yan een ti'ij i Dios.

5 Catu tajitzé ma'can tyihuá'ixaatye', sulu a'íj tu jitze ma'can tyihuá'ixaatye' i Jesús ti ajta Ciriístu' pué'een, tyajta ityáj a'yaa tu tyí'taxaj tyaj a'íin pué'een i tyaj jahuiire' i Jesús a'íjna jime' i tyaj ja'mua xie've'.

6 Ji'nye a'íjna i Dios i ti a'yan tyu'ta'íjtaca' ti huányeeri'cij jo'tij jo'tíca'ca'aj, a'íi pu a'íin pué'een i ti huataséjre yutatzájta', tyej tyij séecan huatyátatzavi'tye'en, tyajta huo'tá'an maj jáamua'tyij a'íjna i ti jin i Dios huápu'i'ij naa huasé'rin a'íjna jimi i Ciriístu'.

A'íj tu jitze tyí'ca'nyej i tyaj jin tyá'tzaahuatye'

7 Ajta a'íjna i ti jin i Dios tyámua' tyitaatá' i ti ajta huápu'i'ij tyá'najchij, tatzájta' pu séejre' i tatyévi'j jitze ti a'yan huasé'rin ti'ij xá'rij xaríj ti jin taavijhua, ta'aj ij huataséjre'en ti'quee ityájma jimi séejre' a'íjna i ti néijmi'i putyí'uurej, sulu ti i Dios jimi já'ma'can.

8 A'yaa pu'ij, tyij tyajta jéehua á'viicue're', catu mue'tiche'en, je'ej tu tyá'tamuajtyej a'íjci jime' je'ej ti tye'mej, ajta catu a'íj jin tátacua'nyii.

9 Je'ej mu pua'aj ta'uurej, ajta i Dios capu matúuhua'naj, metyita'antiyú'nyi'raj, ajta camu ta'antypuá'ritye'sij.

10 Jo'tij na'aj tyaj já'ciinyej, a'yaa tu cha'taj tyana'aj tyaa'á'sij je'ej ti éenye'que' huamuí' i

Jesús, ti'ij ajta tajimí huataséjre'en je'ej ti a'íin tyi'tyúucha'íj.

11 Ji'nye ityáj, tyati'íj tyooj júurij, a'náj tina'aj tu a'yan tya'ajxié'vi'ra' tyaj huá'cui'nyij a'íjci jitze ma'can i Jesús, ti'ij ajta tajimí huataséjre'en i júuricama'ra', a'íjna jitze i tyaj jatyáhue'ra' ti ajta á'puaapua'rej.

12 A'íj pu jin, ityáj tu a'yan tya'ajxié'vi'ra' tyaj huá'cui'nyij, siajta mua'aj juxáahuaj xu huacháatimee.

13 A'yaa pu tyé'yu'si' i yu'xarij jitze tijin: “Nyáaj nu tyá'antzaahuaj, a'íj nu nyij jin tyu'taxájtaca'.” A'yaa pu cha'taj na'aj een ityájma jimi, ityáj tu tyajta tyá'tzaahuatye', tyajta a'íjna jin tyi'xaj.

14 Ji'nye a'yaa tu tyá'mua'reej ti a'íjna i Dios, i ti jaatájuurityej a'íjci i tavástara' Jesús, a'íi pu ajta taatájuuritye'sij ityájma a'íjci jamuán i Jesús, ajta taataséjrataj ja'mua jamuán tyej tyij néijmi'i jimi huatyá'itzeere'en.

15 Néijmi'i pu a'yan tyu'ríj ti'ij mua'ajmaj jamuaatyáhuire'en, mej mij mue'tíj ja'ancuriá'an a'íjna i ti jin Dios tyámua' tyajamuatá'caa, majta je'en mue'tíj tyaatatyójtzi're'en, a'íjna jime' ti huápu'íj naa huasé'rin i Dios.

16 A'íj tu jin quee tyátaxa'huataj. Tyij ajta i tyaj jatyáhue'ra' ti jéjre'citze' séejre' á'puaapua'rej, i ti yutatzájta' séejre' pu jujajcuare' a'náj tina'aj.

17 A'íjna i tyaj jin jajpuéjtzi' capu tyi'tíj je'ej, jiye'tzín pu mu jó'yi'íj, ajta a'yaa pu tyámua' ta'uurej tyej tyij ja'ancuriá'an a'íjci i ti huápu'íj naa huasé'rihua'aj ja'mej jusén jime'.

18 Ji'nye catu a'íj tyí'sej i ti tyí'taavijhua, sulu a'íj tu tyí'sej i tiquee tyí'taavijhua, ji'nye a'íjna i ti taavijhua, capu á'tyeeren, ajta a'íjna i ti quee taavijhua, a'íi pu jusén jime' séeria'aj ja'mej.

5

1 A'yaa tu ityáj een ti'ij i chi'ij cháanacaj japua ti tyu'uj, ti'ij i ináamuaj tiquee jusén jime' séejre', tyajta a'yan tyá'mua'reej tipua'aj huatyá'uunyej a'íjna i ináamuaj, Dios pu arí taatyéechi'tyej u tajapuá ti jusén jin séejre', ti ajta quee muáca'aj jin taavijhua.

2 A'íj tu jin jéehua tyí'mua'tzej a'íjna jime' tyaj tyooj íiyan séejre' i cháanacaj japua, ji'nye a'yaa tu tyá'xie've' tyaj ujo'tyájrutyey u chi'táj ti jútye' já'sejre' i ti ajta Dios jin tie'cánasij,

3 a'yaa pu'ij, tyij tyajta quee tyí'ijcaana, catu muámua'vi'ij tá'ju'un.

4 Meentyij tyooj jityán huacháatimee i ináamuaj, tyátayiin yutatzájta', ji'nye catu jaxie've' ti i Dios tu'huáa'ri' a'íjna i ti jin tie'cánasij, sulu ti a'íin jéetze' tie'cáanaj i júuricamej jime' ti jájcuaj tiquee a'náj á'pua'ren.

5 Ajta i Dios pu a'íin pu'éen i ti tyámua' ta'uurej tyej tyij a'íjna ancuriáan i júuricamej, ji'nye a'íi pu tajimí jaatyájtoo i ju júuricamej, tyej tyij a'íj jin jáamua'reej je'ej tyaj tyi'tíj tya'ancuriáa'sij i Dios jimi.

6 A'íj tu jin a'náj tina'aj jitzán tyí'ca'nyej. A'yaa tu tyá'mua'reej tijin tyati'ij tyooj júurij séjre'ej a'íjci jitze i tyaj jatyáhue'ra', a'yaa tu a' ímuáj tyityejé'sejre' i tavástara' jimi.

7 Catu pújoorej tyaj jaaséj, sulu a'íj tu jitze tyí'ca'nyej i tyaj ja'tzaahuatye',

8 jitzán tu jéehua tyí'ca'nyej, ajta ta'ráanajchi tyaj iitáciinyej a'íjci jitze i tyaj jatyáhue'ra' tyej tyij tavástara' jimi ja'séeria'aj tá'ra'nyij.

9 A'íj tu jin a'náj tina'aj a'yan tyá'huoo tyej tyij tyaatatyójtzi're'en i tavástara', tìpua'aj tyooj a'yan séjre'ej nusu tyequée.

10 Ji'nye a'yaa pu tyúuxie've' tyaj néijmi'i huatátasejrataj jo'tij já'sejre' i Ciriistu' tí'ij a'ín néijmi'caa to'xíjtye'en, aj pu'ij síj ajta síj ja'ancuriáa'sij je'ej tí tyá'ci'puaj, je'ej tí tyí'táj tyu'muáriej tí'ij ooj júuricaj, tìpua'aj xá'pui' huaríj nusu je'ej pua'aj huaríj.

I nyúucarij tí tyámua' ta'uurej i Dios jimi

11 A'íj tu jin, a'yaa tu tyá'mua'reej tí a'yan tyúuxie've' tyaj jéehua já'tyasa'aj i tavástara', a'yaa tutyij tyí'tyese' tyaj hua'antymue'tin i tyétyacaa. Dios pu tyámua' naa tyí'tamuajtyej, a'yaa nu nyij nyajta tyá'xie've' siaj a'yan cha'taj siana'aj mua'aj tyí'tamuajtyej.

12 Catu tyajta tajímua'aj tyámua' tyí'taxaj, sulu ityáj tu jamuatá'caa siaj sij tajíme' ahuóotzaahuatye'en, siata'aj sij jaayí'tihua'an siaj huatányuunyij a'íjma jimi i maj óotzaahuatye' a'íjci jime' je'ej maj tyúusejrataj majta quee a'íjci jime' je'ej maj tyí'mua'tzej i juxiéjnyu'caa tzajta'.

13 Tìpua'aj tyátatimue'raj, a'íj pu jime' tyaj jahuíire' i Dios, na'ríj quee a'yan tyí'ja'yájna, a'yaa tu ricij tyej tyij mua'ajmaj jamuaatyáhuíire'en.

14 A'íjna i ti Ciríistu' jin taaxié'vej a'íi pu tajitzé rá'aj, a'íj tu tyij jin a'yan tyá'mua'reej ti sáij huamuí' hua' jitze ma'can néijmi'caa i tyeítýee, majta je'en néijmi'i jamuán huácuij.

15 Ajta i Ciríistu' pu huamuí' néijmi'caa jitze ma'can, mej mij a'íimaj i maj móoj júurij quee che' jujíimua'aj mana'aj je'ej tyé'ejtyoovej je'ej maj ye'ej tyityetyúucha'íij, sulu mej mij tyámua' tyityetyúucha'íj a'íjci jimi i ti hua' jitze ma'can huamuí', ajta je'en hua' jitze ma'can huatájuuriaca'.

16 A'íj pu jin, catu che' a'tíj je'ej pua'aj tyí'mua'tziire', tyij tyajta tyooj jájcuaj a'yan tyí'mua'ajcaa i Ciríistu' jimi ti tyéviij na'aj pu'é'eenye'ej, ajta ijíij catu che' a'yan tyí'mua'tzej.

17 A'yaa pu'ij, a'íjna i a'tíj ti Ciríistu' jitze ajtyáma'can a'íi pu sáij pu'é'een i tyéviij ti Dios arí jaajájuarej. Pu'ríj metyaja'ajhua'xij je'ej ti tyí'tyúucha'íica'aj ti mí'ma'can jime', ji'nye pu'ríj néijmi'i jin huóojajcuarej.

18 Néijmi'i pu a'íjna a'íin pu'é'een i ti Dios jin tyí'muarie', a'íjna ti jitze ma'can i Ciríistu' tajapuá huatanyúj, ajta je'en taata'íj tyej tyij huo'r'é'ixaatye'en i nyúucaria'ra' tí'ij huó'huiire'en.

19 A'yaa pu'ij huatóomua'aj ti i Dios tyámua' huó'ruuj a'íimaj i maj a'yan huacháatimee i cháanacaj japua, ajta quee huo'xíjtyej a'íjna jime' i maj jimi ootyá'itzee, sulu a'íi pu taata'íj tyej tyij huo'r'é'ixaatye'en i nyúucaria'ra'.

20 A'íj tu jin ityáj a'íin pu'é'een i Dios

tì huo'ta'ít'yaca' tyej tyij tyihuó'ixaaty'e'en ì Ciríistu' jítze ma'can, ì tí a'yan séejre' tí'ij ì Dios tí já'muajee a'íjci jime' ì nyúucarij ì tyaj huá'ixaaty'e'. A'íj tu jin a'yan tyaja'muajee jítzán ma'can ì Ciríistu' siaj tyá'antzaahuaty'e'en ì Dios jimi.

²¹ Ajta ì Ciríistu' capu tyi'tíj jin ootyá'ítzee, tajítzé ma'can pu ì Dios a'yan jáaruuj tyej tyij jamuán ì Ciríistu' jí'rénnye'que' huatyá'ítzeere'en.

6

¹ Ajta ijíj, ityáj tu jamuán tyí'muarie' ì Dios, a'yaa tutyij tyajta jéehua tyaja'muahuavíj siaj ja'ancuriá'an ì tí jin Dios tyámua' tyajamaatá'sij.

² Jí'nye a'yaa pu a'ín tyí'xaj ì yu'xarij jítze tíjin: A'áa nu muáanamujri' tí'ij ajítze juxié'va'ca'aj, nyajta a'ájna xicáara' jítze muaatáhuí nyajta mui'rájtoo.

Ajta ijíj pu a'áan putyajá'ricij siaj ja'ancuriá'an. Ijíj pu a'ájna putyí'ricij ì xicáara' tí jítzán Dios jamui'rátóonyij.

³ Tyajta ityáj catu a'tíj je'ej pua'aj tyí'itíj, na'ríj quee capu tyi'tíj je'ej tyu'tyáhuíre'sij ì tyaj jin tyí'muarie'.

⁴ Tyajta ityáj, a'yaa tu ja'mua jimi tasejrataj matí'ij a'íimaj ì maj tyí'huíre' ì Dios jimi, a'yaa tu jéehua tyé'viícue're' a'íjna jime' ì tyaj jajpuéjtzij, tyajta quee tyi'tíj tyí'cha'íj, ajta tyí'tamuarie'riste',

⁵ majta taatyáavaxij, tyajta huanámi'huaca', mátanyo'si'tye'ej, tyajta tyési'huacan jin

tyí'muarie', tyatáxa'i'rii tyaj atanyéjnye', na'ríij tyaj huatatájcun.

⁶ Tyajta a'yan tyí'tyesejre' tyej tyámua' naa tyi'tyítacha'ij, a'íjci jime' tyaj jamua'tyej i ti jì'rè'can jime', tyajta tyé'viicue' hua' jimi i séecan, tyajta tyámua' huojo'mua'raj i taxa'aj tyeítyee, ji'nye a'íi pu tatzájta' séejre' i júuricama'ra' i Dios, tyajta tzáahuatyí'ra'aj jin hua'xie've'.

⁷ A'yaa tu tyajta tyihuá'ixaatye' i nyúucarij ti jì'rè'can jime', tajitzé pu séejre' a'íjna i ti jin i Dios néijmi'i putyí'uurej. Tyámua' tu naa tyí'muarie', tyej tyij huatyényo'se'en ajta tyej tyij huatyátanaj.

⁸ A'náj taca'aj mu taatyátzaahuatye'sij, majta a'náj taca'aj je'ej pua'aj tyitaatájeevij, a'náj taca'aj mu tyámua' tyitaataxájta, majta a'náj taca'aj je'ej pua'aj tyi'taxáataj muá'ju'un. A'yaa mu tojo'mua'raj tí'ij i mej tyí'hue'tacaa, tyajta ityáj tzáahuatyí'ra'aj tu jin tyí'xaj.

⁹ A'yaa mu tojo'mua'raj cuxáa mequee tamua-jtyej, majta tyámua' naa tyí'tamuajtjej. A'yaa tu huasé'rin cuxáa tyaj já'cui'iihuaj, tyajta tyóoche' tu júurij, puéjtzij mu tatá'caa, majta quee a'íj jin tacui'nyij.

¹⁰ A'yaa tu huasé'rin cuxáa tyátaxaamuijritye', matyajta a'náj tina'aj tatyamua've', a'yaa tu huasé'rin cuxáa tyequée je'ej tyéejviicue', matyajta mui'caa chíjtyaanyi'taj, tyajta a'yan cuxáa tyequée tyi'tíj tyícha'íij, metyajta néijmi'i tyí'ijcha'íij.

¹¹ Ta'ihuáamua' Corinto siaj jo'cháatimee,

tu'ríj tyajamuáa'ixaa ja'huoo'itéericán jíme', tyámua' tu tyeríj tyajamuataséjra a'tyán tyaj pué'een.

¹² Catu ityáj tyi'tíj ja'mua'aviitze', mua'aj xu a'ín pué'een i siaj tyi'tíj avaaj i jutzájta'.

¹³ A'íj nu jin a'yan tyaja'muahaviiij, a'yájna tí'ij a'tíj tí jéehua hua'xie've' i juyójmua', siaj nyejitzé tyú'ca'nyej, a'yájna nyati'ij nyáaj ja'mua jitze tyí'ca'nyej.

Ityáj tu a'ín pué'een i tyeyúuj Dios tí tzajta' iirájcaj

¹⁴ Caxu a'yan rijcaj mati'ij a'íjma i maj quee tyá'tzaahuatye'. Xu'huóomua'tzij a'íjna jíme', ¿ji'nye tyí'rij tí síj na'aj pué'eenye' a'íjna i tí naa een ajta a'íjna tí je'ej pua'aj een? ¿Ca' ji'nye tyí'rij maj antyóonaxcaj i tatzárij ajta i tíca'rij?

¹⁵ Capu je'ej tyí'rij maj huóojaahuatye'en i Ciriístu' ajta i tyiyáaru', capu ajta je'ej tyí'rij maj huóojaahuatye'en a'íjna i tí tyá'tzaahuatye' a'íjna jamuán i tíquee tyá'tzaahuatye'.

¹⁶ ¿Tyi'tanyí je'ej metyí'xa'pui'intare' a'íimaj i maj jusi'rii i tyeyúuj tzajta' Dios tí ja'a'rij a'íjma jamuán i sánturij? Ji'nye ityáj tu a'ín pué'een i tyeyúujra' i Dios tí júurij, a'yájna tí'ij a'ín tyu'taxájtaca' tíjin:

Nyáaj nu hua' tzajta' u'séeria'aj na'mej,
nyáaj nu hua' Dios pue'éenye'ej na'mej,
majta a'íimaj nyetye'ítyeristyamua' mu
pue'éenye'ej muá'ju'un.

¹⁷ A'íj pu jin ajta a'yan tyí'xaj i tavástara' tíjin:
Xa'vá'ciinyij hua' tzajta',
caxu che' a'yan rijcaj mati'ij a'íimaj.

Aj nu nyij nyáaj jamuaataxié've'ej,
 18 nyáaj nu ja'muavástara' pue'éenye'ej na'mej,
 siajta mua'aj nyiyóojmua' xu pue'éenye'ej
 xá'ju'un,
 a'yaa pu tyí'xaj i tavástara' i ti néijmi'i jin
 tye'entyúumua'ree.

7

1 A'yaa pu'ij, ta'ihuáamua' mu tyaj
 já'muaxie've', a'íi pu a'íin pué'een i Dios ti
 jin tya'tóoratziiri'. A'íj pu jin tyiche' tyámua'
 eenye' i tatyévíj jitze tyajta i tajúuricamej
 jitze, a'yaa tu tzáahuatyí'ra'aj tyí'ijcha'íj
 i Dios jimi tyetyí'tyese' tyej tyij jí'rén'ye'ej
 huatyá'itzeere'en.

*Pablo pu huatóotyamua'vej a'íjci jime' maj
 tyá'antzaahuaj i Corinto maj ja'chej*

2 Siataataxié've' mu juxiéjnyu'caa tzajta'. Catu
 a'tíj je'ej pua'aj jó'mua'rajca'aj, catu tyajta a'tíj
 je'ej pua'aj huáruuj, catu a'náj a'tíj tyu'xívi'ri'.

3 Canu a'yan tyajámua'ixaatye' nyej nyij je'ej
 pua'aj tyajamuaaxáj, jí'nye nu'ríj a'yan tyaja-
 muáa'ixaa, mua'aj xu ú'sejre' yunyatzájta', ty-
 ata'aj tyij néijmi'i júurij huatyá'itzeere'en nusu
 tyaj néijmi'i huácui'nyij.

4 Canu tyi'tíj aváataj nyetyajámua'ixaatye',
 jéehua nu nyij á'nyatzaahuatye' ja'mua jime'.
 Tyij nyajta jajpuéjtzij, jéehua pu nú'ca'nyisti'
 nyajta nu nyetyamua've'.

5 Tyati'íj a'áa ja'rá'aj a Macedonia, catu ma'
 já'taso'pe', sulu jo'tíj na'aj tu jajpuéjtzica'aj,

jéehua tu á'viicue'ria'ca'aj hua' jimi i tyeítýee, tyajta tyí'tziinya'ca'aj.

⁶ Ajta i Dios, i ti ca'nyíjra'aj hua'tá'caa i maj je'ej tyityóomuajtyej, tyámua' pu táaruuj tí'ij a'ín uvé'nyej i Tito,

⁷ ajta capu a'íi na'aj i ti a'ín yará'aj, sulu ti a'ín ajta jutyamua'va'ca'aj ja'mua jime'. A'íi pu taaté'exaa siaj mua'aj jéehua huápuí'ij tasejracuj, ajta i siaj juxaamuijritýe' a'íjna jime' siaj jamua'reericuj je'ej ti tyí'nyahuíre', a'íj nu jin jéetze' huatányetyamua'vej.

⁸ Tyij ajta jamuaatáxaamuijritýej i yu'xarij nyaj jamuaata'ítýi'ri', capu ijíj je'ej pua'aj nya'asej. Ajta anaquéej pu je'ej pua'aj nya'axcaj, nyati'ij jaaséj i ti cii tyajamuaatáxaamuijritýej,

⁹ ijíj nu nyetyamua've', canu a'íjna jime' i siaj huatóoxaamujri, sulu a'íj nu jin i siaj huatóoxaamujri siaj sij siajtáhua'aj ja'antzaahuatýe'en i Dios. A'yaa xu tyityaatóoxaamuijritýej je'ej ti i Dios tya'ajxié'vi'raca'aj, a'íj tu jin quee itýáj je'ej pua'aj jamuáaruuj,

¹⁰ jí'nye a'íjna i siaj jin huatóoxaamujritýej Dios pu jimi jo've'mej siaj sij tyu'túu'uunyi' ajta tí'ij jamuáahuíre'en, a'íj pu jin quee je'ej metýejé'týi'tij siaj sij juxaamuijritýa'aj. Ajta a'íi pu tyu'jé'caj i xaamuíjrira'aj íyan ti ma'can i cháanacaj japua.

¹¹ I siaj jin huatóoxaamujritýe'en, Dios jimi pu jo've'mej, xaaséj je'ej ti atýojo're'nyej. Jéehua xu jaatyátzaahuatýej siajta nyaj japua huatanyúj, siajta huatanyínyu'cacuca', siajta tyu'tátziin. Sia-

jta je'en jéehua jaataxié'vej siaj naaséj, a'íj xu jin puéjtzij jaatá' a'íjci i ti je'ej pua'aj rijcaa. A'íj pu'ij jin néijmi'i a'yan tyu'taséjre siaj mua'aj quee tyi'tíj jin ootyá'itzee.

¹² A'yaa pu'ij, nyati'ij tyajamuaata'ityi'ri', canu a'yan huaríj a'íjna nyamua'tzaj i a'tíj ti ootyá'itzee, nusu i ti séej jimi ootyá'itzee, sulu ta'aj ij huataséjre'en i Dios jimi a'chu siaj tajimí tyi'ca'nyej.

¹³ A'íi pu a'íin pué'een i ti jéehua naa taatá'aj. Ajta capu a'íi na'aj i ti naa taatá'aj, sulu tyajta tu huátatyamua'vej a'íjna jime' ti i Tito yará'aj jutyamua've'ej, ji'nye néijmi'i xu mua'aj ca'nyíjra'aj jaatá'.

¹⁴ Nu'ríj nyáaj a'yan tyaaté'xaatya'ca'aj i Tito nyaj jéehua á'nyatzaahuatye' ja'mua jime', siajta mua'aj caxu naatatyévi'rastej. Ji'nye néijmi'i i tyaj tyeríj jamuáa'ixaa, a'yaa pu tyi'ja'yájna, a'yaa pu cha'taj na'aj tyi'ji'r'é'can jime' je'ej tyaj tyaaté'exaa i Tito, tyaj jéehua á'tatzaahuatye' ja'mua jime'.

¹⁵ A'íjna i Tito jéetze' pu já'muaxie've' ti'ijta jo'támua'reej je'ej siaj néijmi'i jéehua huápu'íj tyeetyátzaahuatyej.

¹⁶ Jéehua nu nyetyamua've', a'íjna jime' i ti i'ríj nyej nyaxáahuaj ja'mua jitze tyú'ca'nyej.

8

I maj juxié'vi'ra' jin tyi'tá'caa i maj jusi'rii i tyeyúuj tzajta'

¹ Ajta ijíj ta'ihuáamua', a'yaa tu tyá'xie've' tyaj jamuaaté'exaatye'en je'ej ti Dios tyámua'

tyihuo'tá' a'íjma i maj jusi'rii i tyeyúuj tzajta' a'áa ti huataca'aj a Macedonia.

² Tyij majta jéehua jajpuéjtzij mu'ríj néijmi'i jin tyo'táviicue'ri', jéehua mu mij jutyamua've', capu je'ej tyij majta quee je'ej tyéejviicue', i maj tyu'tá' juxié'vi'ra' jime' jéehua pu tyu'tyáhuuii cuxáa chíjtyaanyi'ij maj pué'eenye'.

³ Nyáaj nu jamua'reej maj tyu'tapuéjve a'chu maj caa putya'uurejve'ej, majta juxié'vi'ra' jin jéetze' a'yan huaríj. A'íimaj mu jujímua'aj huatyóohuij

⁴ maj taatáhuaviiri' tyaj huo'tá'an maj huo'tyáhuuiire'en a'íjma i maj i Dios jitze ajtyáma'can.

⁵ Majta a'íimaj camu a'yan mana'aj tyu'tapuéjve je'ej tyaj tye'ejchó'va'ca'aj, ji'nye anaquéej mu i tavástara' jimi huatóotoj, majta je'en ityájma jimi, a'yájna ti'ij i Dios tya'ajxié'vi'ra'.

⁶ A'íj tu jin jéehua jahuaviiij a'íjci i Tito ti a'íin jaariá'siire'en ja'mua jimi i siaj juxié'vi'ra' jin tyu'tá', a'íjna i ti arí anaquéej huatyóochej ja'mua tzajta'.

⁷ Ji'nye mua'aj jéetze' xu tyí'mue'tij, a'íjna jime' i siaj tyá'tzaahuatye' i tavástara' jimi, ajta ja'mua'i'riitye' siaj huo'té'exaatye'en i nyúucarij, siajta tyámua' tyá'mua'reej je'ej ti ajóo'en i Dios jimi, siajta juxié'vi'ra' jin taataxié'vej i siaj ityájma jimi jaarí'rej, a'yaa pu cha'tána'aj siaj sij tyu'tyámue'tin a'íjna jime' i siaj séecan huatyáhuuiire'en.

⁸ Canu nyej nyij a'yan tyaja'mua'íitya'aj

nyaja'mua'ixaatye', sulu a'íj nu siaj sij jáamua'reej je'ej maj majta séecan tya'ajxié'vi'ra', mej mij mua'ajmaj jamuaataséjratye'en maj jí'ré'can jime' já'muaxie've'.

⁹ Ji'nye xu'ríj mua'aj jamua'reej ti i tavástara' Jesús, i ti ajta Ciriístu' pué'een, a'íi pu néijmi'i tyí'ijcha'íj a'yan tyu'tóosejrataca' tí'ij síj tiquee je'ej tyéejviicue', tí'ij ja'mua japua huatányuunyij, siaj sij mua'aj a'íjna jin a'íin pue'éenye'ej xá'ra'nyij i maj tya'ancuriáa'sij i Ciriístu' jimi.

¹⁰ A'yaa nu nyáaj tyajá'mua'ixaatye' je'ej nyej nyáaj tyí'mua'tzej a'íjna jime' i siaj huo'tyáhuuire'en. Tí'ij na'aj ju'síj, caxu a'íj siana'aj jin huatyóohuij siaj huo'tyáhuuire'en i séecan, sulu a'yaa xu siajta huaríj xuu-tyámua've'ej.

¹¹ Ajta ijíj, je'ej siaj caa putya'uurejve, siata'aj ja'antyíci'tyij i siaj ju'huatyáhuuij, a'yan naa setyuutyámua've'ej siati'ij jájcuaj imuáj tyu'huatyáhuuij siaj a'yan huárinyij.

¹² Ji'nye tipua'aj a'tíj jí'ré'can jime' a'yan tyá'xie've'ej ti tyi'tíj tyu'tá'an, Dios pu ja'ancuriáa'sij a'chu ti caa tyi'tíj tyu'tá'sij. Capu i Dios tyu'huavij tyi'tíj tiquee síj tyícha'íj.

¹³ Capu ajta a'yan tyi'tyéevijtíj ti a'íjna jime' siaj séecan huatyáhuuü mua'ajmaj tyi'tíj ja-muá'itziitye'ej, sulu siaj sij juxa'aj siana'aj eenye'.

¹⁴ Ajta ijíj mua'aj xu tyí'ijcha'íj i séecan ti tyá'itziitye', ajta majca'huáyee, a'íi mu mijta

jamaatáhuire'sij a'íjna jime' i ti mua'ajmaj tyajamua'itziitya'aj ja'mej.

¹⁵ A'yájna ti'ij tyé'yu'si' i yu'xarij jitze a'yan tijin: “Capu tyi'táj avá'itzeerej a'íjci jimi i ti jéehua jáasi, capu ajta tyi'táj jo'tyá'itziityej a'íjci i ti cíi na'aj tyáasi.”

Pablo pu i Tito huata'ityaca' a Corinto

¹⁶ Tyámua' nu tyé'tyojtzi're' i Dios ti ca'nyíjra'aj jaatá' a'íjci i Tito siaj sij a'yan cha'taj siana'aj jitzán tyuuxié've'ej siati'ij nyej jimi.

¹⁷ A'íi pu ja'ancuriáa' i nyaj tyee'íjcaj, siajta mua'aj xu jéehua jitzán juxie've', a'yaa pu'ij ijíj tyajaxié'vi'ra' ti a'áa jó'me'en ja'mua jimi.

¹⁸ Jamuán i Tito, séej nu huata'ityaca' i ta'ihuáara' ti'ij ajta jamuán ujó'me'en. A'íjna i ta'ihuáara', néijmi'que' mu tyámua' naa yó'sej a'íjci jime' ti a'íin tyámua' naa tyí'muarie' i nyúucaria'ra' jime' i Dios.

¹⁹ Ajta, a'íimaj i maj jusi'rii i Dios jimi, a'íi mu ja'antyíhuoj ti'ij tajamuán jo'cha'canye'en ajta tyu'tyáhuire'en a'íjna jime' i tyaj tyí'muarie', i tyaj jin tyámua' tyeetyátoonyij i tavástara', ajta tyej tyij jamuaataséjratye'en i tyaj jéehua já'muahuiria'cuj.

²⁰ A'yaa tu tyá'huoo ti'ij quee a'táj je'ej pua'aj tyi'taxajtaj a'íjna jime' tyaj jéehua jáasiire'en i siaj mua'aj tyi'tá'caa.

²¹ Tyajta tu jahuoo tyej tyij a'náj tina'aj xá'pui' rijcaj je'ej ti tyi'tyéevijtíj, catu a'íj tyana'aj jimi i tavástara', sulu tyajta tu a'yan ricíj hua' jimi i tyeítyee.

22 Hua' jamuán a'íjma i tyaj huo'ta'ítýaca', séej nu nyajta huata'ítýaca' i ta'ihuáara', i ti arí mue'tíj taataséjra ti a'ín a'yan tya'ajxié'vi'ra' ti taatáhuüre', ajta ijíj jéetze' pu óoca'nyej a'íjna jime' ti huápuí'ij jéehua ja'mua jitze tyí'ca'nyej.

23 Ajta a'íjna i Tito a'íi pu a'ín pué'een i ti nyajamuan tyí'muarie' tyej tyij mua'ajmaj jamuaatyáhuüre'en. Majta a'ímaj i maj hua'puaj i ta'ihuáamua', a'íi mu a'ín pué'een i maj huo'ta'ítýaca' a'ímaj i maj jóosi'rii mej mij i Ciríistu' tyu'tatyójtzi're'en.

24 Ajta mata'aj mij jáamua'reej i maj jusi'rii, siata'aj huo'taséjratye'en a'íjma i tyétyacaa siaj tzáahuatyí'ra'aj jin hua'xie've', mej mij majta jáamua'reej ti a'yan tye'tyévijtye' i tyaj á'tatzaahuatyé' ja'mua jime'.

9

1 Ajta a'íjna jime' i tyaj jin huá'huüre' a'íjma i ta'ihuáamua' i maj a'yan cha'taj mana'aj tyá'tzaahuatyé', capu juxie've' nyej tyajtáhua'aj a'íjci jin tyajamuaatayú'se'en siaj sij a'yan huárinij,

2 ji'nye nu'ríj jamua'reej siaj jéehua mua'aj a'yan tya'ajxié'vi'ra'. A'íj nu jin á'nyatzaahuatyá'aj a'yan nyetyihuá'ixaatyé' a'íjma i maj Macedonia jo'cháatimee, a'yaa nu tyihuá'ixaatyé' ti arí séej nyinyi'ra'aj tyooméj siaj tyámua' huóoruuj mua'aj Acaya siaj jo'cháatimee, a'íj mu mij jin majta mue'tíj a'yan tyitya'huóoca'an mej mij majta tyu'tyáhuüre'en i Macedonia maj jo'cháatimee.

3 Nyajta nyáaj, a'yaa nu een jime' ta'ihuáamua' tyu'ta'ítyaca' ja'mua jimi, ti'ij quee a'yan tyá'ra'nyij nyaj huáapua'aj nyana'aj á'nyatzaahuatya'aj nyati'ijta mua'ajmaj jamuatyáxajtasime'en. Sulu siata'aj sij tyámua' eenye' je'e'j nyaj nyerij tyihuo'té'exaaj mua'ajmaj jime',

4 ji'nye tipua'aj séecan i maj Macedonia já'ma'can nyajamuan mó'ju'un, majta je'en jamuáatyoonij sequée tyámua' éenya'caj. Aj pu'ij taatatyévi'raste'sij ityájma, capu mua'ajmaj sulu ityájma pu a'íjna jime' tyaj mua'ajmaj jin á'tatzaahuatye'.

5 A'íj pu jin a'yan tyina'ránajchaca' nyaj huo'táhuaviij i nye'ihuáamua' mej mij jó'ju' ja'mua jimi mej mij anaquéej jamuáamuaarej, ajta siaj sij huo'tá'an i siaj jin tya'tóoratziri' siaj tyu'tapu'éjve'en. A'yaa xu sij juxié'vi'ra' jin tyu'tá'sij, capu a'yan éenye'e'j ta'mej ti'ij nyaj ca'nyéjrij jin jamuaata'íj siaj sij tyu'tapu'éjve'en.

6 A'íj xu ootámua'reej: A'íjna i ti cíi na'aj tyu'tá', cíi pu'uj ajta tya'ancuriáa'sij, ajta i ti jéehua tyu'tá', jéehua pu ajta tya'ancuriáa'sij.

7 A'yaa pu tyúuxie've' ti síij ajta síij tyu'tá'an a'chu ti a'yan tya'ajxié'vi'ra' i jutzájta', che' quee jamuáacha'aj nusu ca'nyéjrij jime', ji'nye Dios pu jaxie've' i a'tíj ti jutyamua've'e'j tyu'tá'.

8 Dios pu jaayí'tin ti jaatámui'ren i ti jin tyámua' tyajamuaatá'an, siaj sij a'náj tina'aj néijmi'i tyí'ijcha'ij, ajta ti'ij tyí'ci'paa siaj séecan huatáhuire'en.

9 A'yaa pu tyá'xaj i yu'xarij jitze tijin:

Jéehua pu tyihuo'tá' a'íjma i maj quee je'ej tyéejviicue',

ajta i ti jin xá'puí' ricij, a'íi pu jusén jime' séejre'.

¹⁰ Dios pu a'íin pué'een i ti tyu'tá'caa i ímue'rij ti huahuásti'huaca', ajta i cue'ráj ti tyí'cue'ri', a'íi pu'ij ajta néijmi'i tyajamuaatá'sij, ajta já'muahuosi'ran, siaj sij jéetze' tyu'muárie'en a'íjna jime' i ti xá'puí' een.

¹¹ A'yaa xu néijmi'i tyi'ijcha'íj xá'ju'un siaj sij juxié'vi'ra' jin tyihuo'tapuéjve'en. Ajta i siaj mua'aj mutyojo'ta'ítyaca', a'yaa pu tyu'tyáhuüre'sij mej mij i ta'ihuáamua' tyaatatyójtzi're'en i Dios.

¹² Ji'nye tyati'ij huo'táhuüi i ta'ihuáamua', catu a'íj tyana'aj tyihuo'tá' i ti tyihuá'itziitya'ca'aj, sulu tyajta tu ca'nyíjra'aj huo'ta' mej mij tyaatatyójtzi're'en i Dios a'íjna jime' je'ej siaj huaríj.

¹³ A'íi mu majta tyaatatyójtzi're'ej i Dios, ji'nye a'íi mu a'íjna jin jamua'reeren i siaj jin huo'tyáhuüi siaj ja'astej i Ciriistu'. Majta mu jaatyátzaahuatye'sij i Dios, a'íjna jime' je'ej siaj mua'aj tyihuá'huüre' a'íjma, siajta néijmi'caa i séecan.

¹⁴ Majta je'en jaatáhuosij i Dios jimi ja'mua jime' jéehua maja'muaxié've'ej, a'íjna jime' ti i Dios jéehua huápuí'ij tyámua' tyihuo'tá' je'ej siaj tyi'tíj jin huaríj.

¹⁵ Tyiche' tyaatatyójtzi're'en i Dios, ji'nye a'íi pu taatapuéjve i ti huápuí'ij juxié've' i ti quee maja' nyúucarij tyaj jin jaataxáj.

10

Pablo pu japuan huatanyúj i ti jin tyí'tyéjvee

¹ Nyáaj, i nyaj Pablo pué'een, a'yaa nu tyaja'muahuaviiij, a'íjna jime' ti i Ciríistu' ná'ancu'vaxij, tyij majta a'yan tyí'nyaxaj yee nyaj jee tyí'tziinye' tipua'aj ja'mua jamuán anyo'tyávaacaj, nyajta je'ej huányaxaxa'aj tipua'aj ya' imuáj naatyávaacaj.

² A'yaa nu nyij tyaja'muahuaviiij, nyati'ij a'áa jó'me'en ja'mua jimi, siaj quee ca'nyíjra'aj ny-atá'care'en nyej nyij a'yan huatányesejrataj nyaj á'nyaca'nyej yunyatzájta' a'íjma jimi i maj a'yan tyí'taxaj tyaj a'yan cha'taj tyana'aj ricij mati'ij a'íimaj i maj íyan huacháatimee i cháanacaj japua, ji'nye ná'nyaca'nyej nyaj a'yan tyihua'rájeevej.

³ A'yaa pu ajta tyi'ja'yájna tyaj tyeítyee pué'een, tyajta catu a'yan tyí'tyenyose' mati'ij i tyeítyee i maj a'yan séejre' i cháanacaj japua.

⁴ I tyaj jin nyo'se', capu íyan tyí'ma'can i cháanacaj japua, sulu a'íi pu a'íin pué'een i Dios ti néijmi'i jin putyí'uurej. A'yaa tutyij néijmi'i tye'entyí'uunaj i maj jin tajitzé tyí'pua'ritye'

⁵ tyajta i maj jin óotzaahuatye' mej mij tyi'tyánaamuaj maj jáamua'tyij i Dios. Néijmi'i i hua'mua'tziira'aj a'íj tu jimi tyu'tátuire'en i Ciríistu', ta'aj ij a'íj ará'astej,

⁶ tyajta tyámua' een tyej tyij puéjtzij jaatá'an a'íjci i ti quee tyihuojojó'itej, tipua'aj serij mua'aj néijmi'i jin ja'rá'astej i Dios.

⁷ Xaaséj a'íjci i ti séejre'. Tipua'aj a'tíj a'yan tyámua' naa tyá'mua'reeriaj ti i Ciríistu' jitze

ajtyáma'can, che' ajta a'yan tyá'mua'reeriaj tyej tyajta ityáj i Ciríistu' jitze ajtyáma'can.

⁸ Tipua'aj nyáaj jéetze' ná'nyatzaahuatye'ej a'íjna jime' i ti jin nyavástara' tyinaata'íj, capu nyetyevi'raste', ji'nye i tavástara' pu a'yan tyi-taata'íj tyej tyij tyámua' jamuáa'uurej capu tyej tyij jamua'antyipuá'ritye'en.

⁹ Canu a'yan tyá'xie've' ti'ij a'yan séjre'ej yee nyaj já'muamuaritye' a'íjna jime' je'ej nyaj tyajá'muayu'se'ej.

¹⁰ Séecan mu a'yan tyí'xaj tijin nyej jee ca'nyéjrij jin tyajá'mua'ijtye' a'íjna i yu'xarij jitze, ajta tipua'aj ja'mua jamuán anyo'tyávaacaj canu jee á'nyaca'nyej nyaj a'yan tyajamu-até'exaatye', nyajta jee quee tzáahuatyi'ra'aj jin tyí'xaj.

¹¹ Ajta a'íjna i ti a'yan tyí'xaj, che' jáamua'reej tijin a'yaa tu tyí'xaj tipua'aj ya' imuáj taatyú'uucaj, tyajta a'yan rinyij tyati'ij ja'mua jimi jo'tyú'uucaj.

¹² A'yaa pu tyi'ji'r'é'can jime', tyaj quee á'taca'nyej tyej tyij tajímua'aj á'tatzaahuatye'ej, mati'ij i séecan jusejrataj ja'mua jimi. Majta a'íimaj camu xá'pui' metyityoomuámua're' mej mij jujímua'aj óotzaahuatye' séecan jamuán.

¹³ Catu ityáj a'yan tyá'tatzaahuatye' je'ej ti'quee tyitatyévi'jtye'. A'yaa tu'uj ricij a'chu ti i Dios tatá'caa tyej tyij ahuátatzaahuatye'en a'íjna jime' i tyaj jin tyí'muarie', a'íi pu'ij taatá' tyej tyij mua'ajmaj jimi ja'rá'astij mu siaj Corinto ja'chej.

¹⁴ A'íj tu jin quee a'yan ricij je'ej ti'quee tyitatá'caa, a'yaa pu tya'ra'nyíiche' tipua'aj tye-

quée jájcuaj ímuáj a'áa ja'tanyéjnyiiche' ja'mua jimi. Ityáj tu a'ín pué'een i tyaj anaquéej jamuaaté'exaa i nyúucaria'ra' i Ciríistu'.

¹⁵ Catu tyajta a'íjna jin á'tatzaahuatye' je'ej maj i séecan tyu'muáriej, a'yaa tyi'tíj tya'uuriáaj tiquee xá'pui'. Sulu a'yaa tu tyá'xie've' tyaj jéetze' tyu'tyáhuire'en ja'mua jimi, a'yájna siati'ij mua'aj seríj tyá'tzaahuatye'.

¹⁶ A'yaa tu tyajta tyá'xie've' tyaj huó'ixaatye'en i nyúucaria'ra' i Ciríistu' i maj a' ímuáj jo'cháatimee séej chuéj japua, jo'maj quee xu séecan tyojo'muáriej, tyej tyij quee ahuátatzaahuatye'en a'íjna jime' je'ej maj séecan tyu'muáriej.

¹⁷ Típua'aj a'tíj tyi'tíj jin óotzaahuatya'mui'ij, che' i tavástara' jimi ahuóotzaahuatye'en.

¹⁸ Ji'nye a'íjna i ti jusíj tyámua' tyúusejrataj, capu a'ín pué'een i ti Dios jaataxié'vej, sulu a'íjna i a'tíj tavástara' ti tyámua' tya'tá'caa.

11

Pablo pu tzáahuatyi'ra'aj jin tyi'tyéjvee i tavástara' jimi

¹ A'tzúj cuj cii setyino'viicue', tyij nyajta a'yan huasérihua'aj cuxáa nyenyatímue'raj nyetyaja'mua'ixatye'. Che' je'ej tina'aj, siano'táviicue'.

² Ji'nye a'íjna i nyaj jin chueerij ja'mua jime' Dios jimi pu jo've'mej. A'yaa nu tyaaxá'pui'intarej siaj sij a'íj siana'aj jimí hu- atyá'itzeere'en i Ciríistu' sequée tyi'tíj jin

a'itzéeria'aj, yaa tí'ij íiti' tiquee xu tyáataj ja-muán hui'caa.

³ Ajta a'yaa nu tyí'tziinye' tìpua'aj a'tíj ja-muáacuanamuaj tí'ij i cú'cu'uj tyáacuanamuaj a'íjci i Eva, siaj sij quee che' tzáahuatyí'ra'aj jin já'astijria'aj i Ciriístu'.

⁴ Tyámua' xu mua'aj tyihuá'jepe' tìpua'aj sáij mu jo've'mej tí séecan i nyúucarij jime' jaxaj a'íjci i Jesús, tiquee a'yan huánamuajrii je'ej tyaj tyerij tyajamuáa'ixaa, siajta xu ja'ancuriáa'vej séej i júuricamej tiquee a'íin pu'é'een i Dios tí anaquéej jaatyájtoo ja'mua jimi, ajta sáij i nyúucarij tiquee a'yan huánamuajrii tí'ij i siaj serij ja'antzaahuaj.

⁵ A'yaa pu'ij, capu a'yan nya'asej nyaj jéetze' ciléenye' jin tyí'huiire' mequee a'íimaj i maj nu'uj huápuí'ij va'cán jin tyityetyu'uj.

⁶ Tyij ajta quee nyai'riitye' nyej nyij tyámua' naa tyu'taxáj hua' jimi i tyeítyee, capu a'yan een i nyaj jin ucájmua'rej, a'íj tu tyij a'náj tina'aj já'muasejratye', tyajta néijmi'i jin a'yan ricij.

⁷ ¿Nyiquij je'ej pua'aj naaríj nyatí'ij huáapua'aj nyana'aj jamuaaté'exaa i nyúucaria'ra' i Dios, nyajta hu- atyenyaxáahuataca' siaj sij mua'aj ahuóotzaahuaty'e'en?

⁸ Nyáaj nu huári'ri' i hua' túmii a'íimaj i maj a'yee jusi'rii i Dios jimi, nyej nyij a'íjna jin huatyényahuiire'en nyajta mua'ajmaj ja-muaatyáhuiire'en.

⁹ Ajta nyatí'ij a'áa jo'tyaváacaj ja'mua jimi capu tyi'tíj no'tyá'itziij, canu tyi'tíj jin jamuaata-

muárie'ristej, ji'nye a'íimaj i nye'ihuáamua' i maj a'áa ja'ráacij a Macedonia, a'íi mu tyinaatá' i ti tyiná'itziitya'ca'aj. A'yaa nu tyá'xie've' nyaj quee jamuaatamuárie'riste'en, nyajta nyooj a'yan tyu'ma'aj na'mej.

¹⁰ Tyámua' nu naa tyá'mua'reej i ti a'yan tyi'ja'yájna i Ciriistu' jimi, a'yájna ti'ij ajta quee a'tíj tyináa'ri'raj i nyaj jin á'nyatzaahuaty'e' néijmi'que' a'áa ti huataca'aj a Acaya.

¹¹ ¿Ji'nye een jime' a'yan nyetyi'xaj? ¿Nyiquij a'íjna jime' nyaj quee já'muaxie've'? Dios pu jamua'reej tijin nyajá'muaxie've'.

¹² Nyajta nyóoche' nu a'yan tyu'ma'aj na'mej, nyej nyij quee huo'tá'an a'íjma i maj jahuoo mej mij cha'mana'aj tyi'tíj jin óotzaahuaty'e', maj quee a'yan tyí'muarie' tyati'ij ityáj,

¹³ ji'nye a'íi mu'uj pu'éen i maj quee tzáahuatyira'aj jin huata'ítyi'huaca', majta tyú'cuanamuaj a'yan metyuuséerataj ti nu'uj i Ciriistu' huojo'ta'ítyaca'.

¹⁴ Ajta a'íjna capu je'e'ej ta'sejratye', ji'nye i tyiyáaru' pu ajta a'yan jusejrataj ti'ij sáij ti tyí'huüre' u tajapuá,

¹⁵ a'íj pu jin quee je'e'ej ámiteere' tipua'aj a'íimaj i maj jahuüre' i tyiyáaru' a'yan metyúusejrata maj a'íjna jin tyí'huüre' i ti xá'pui' een. Majta a'yaa mu tyitye'entyipua'rij je'e'ej maj tyaamue'tij a'íjna jime' je'e'ej maj tyi'tíj huáruuj.

I ti jin jajpuéetzij a'íjna i Pablo

¹⁶ Nyajtáhua'aj nu a'yan tyaja-muaaté'exaatye'ej ti quee a'tíj a'yan tyí'mua'ajcaj

yee nyej nyatimue', ajta tipua'aj a'yan metyí'mua'ajcaj, siata'aj naata'an nyaj a'yan tyu'taxáj tí'ij túutimue', nyej nyij nyajta nyáaj ahuá'nyatzaahuatye'en,

17 ajta a'yájna nyati'ij tyé'nyatzaahuatye' nyenyatímue'raj, capu a'yan tyí'xa'pui' i tavástara' jimi.

18 Ji'nye mue'tíj mu óotzaahuatye' a'íjna jime' je'ej maj tyu'muáriej, a'yaa nu nyij nyajta nyáaj tyé'nyatzaahuatye'en.

19 Tyámua' xu mua'aj metyityoomuámua're', a'íj xu jin tyámua' naa tyé'viicue' a'íimaj jimi i maj jutímue',

20 siajta xu tyé'viicue' a'íjma jimi i maj ca'nyéjrij jin tyajá'mua'ijtye', na'ríij i maj tya-jamuáa'ri'raj, nusu i maj já'muacuanamuj, i maj já'muaxana've', ajta i maj jamua'ráava'raj i ja'mua jiise'.

21 Tyij ajta nyetyevi'raste' nyaj jaataxáj, catu ityáj ahuátaca'an tyej tyij a'yan huárinyij mati'ij a'íimaj.

Ajta tipua'aj séecan a'yan metyóotzaahuatya'aj, a'yaa nu nyajta nyáaj tyé'nyatzaahuatye'en, tyij ajta quee xá'pui'.

22 ¿Nyiquij Hebreos maj pué'een a'íimaj? Nyáaj nu nyajta a'íin pué'een. ¿Nyiquij a'íjna jitze mua'ajtyáma'can i Israel? Nyáaj nu nyajta a'íjna jitze ajtyáma'can. ¿Nyiquij i Abraham jitze mue'rá'ma'can? Nyajta nu nyáaj a'íjna jitze eeráma'can.

23 ¿Nyiquij metyí'huiire' i Ciríistu' jitze ma'can? Jéetze' nu nyáaj a'íjna jime'

tyí'huüre', tyij nyajta ijíj nyatímue'raj nyetyajá'mua'ixaatye'. Nyáaj nu jéetze' tyu'muáriej mequee a'íimaj, nu'ríj jéetze' mue'tíj huanámi'huaca' mequee a'íimaj, majta mue'tíj meríj naatyáavaxij, nyajta nu mue'tíj tin huamuí'.

²⁴ Anxívij mu pua'máj puéjtzij naatá' a'íimaj i maj Israel jitze ajtyáma'can, a'íjci jime' i maj se-ityéj japuan tamuáamuata' japuan arámuaacuj pua'máj nie'riá'vaxij.

²⁵ Huéecaj mu natyáavaxij ciyéj jime', majta séej naatyáto'sixij tyetyéj jime'. Huéecaj pu ajo'cájrupid i báarcuj i nyaj tzajta' yi'cacaria'aj, séej tíca' nyajta séej xicáj nu á'tyeej nyaj jájtyij japua huajósij.

²⁶ Jéehua nu nyeríj huáraa i juyéj jitze, nyajta tyu'tátziin a'íjna jime' nyaj antáyi'caa i játya'naj jitze, nyajta a'íjma jime' i náhua'rij, nyajta a'íjma jimi i nyetyeéityeristyamua', na'ríj a'íjma jimi i maj séej chuéj japua já'ma'can. Nyajta nu a'yan cha'taj nyana'aj tyu'tátziin i chájta'naj jitze, ajta jo'tíj quee ja' a'tíj, nusu i jájritze', nyajta a'íjma jimi i maj a'yan tyúusejrataj maj nu'uj ta'ihuáamua' pué'een.

²⁷ Jéehua nu á'viicue're', nyajta jéehua japuéjtzij, mue'tíj nu huatáxa'ii nyaj quee che'cutzuj, nyaapuéjtzitariaca' a'íjna jime' nyaj huataí'cuataca' nyajta huataí'imuj, mue'tíj nu quee tyú'cuaa, nyajta huatyáxaamuj, nyajta quee tyí'chajca'aj.

²⁸ Ajta a'náj tina'aj nu je'ej tyé'nyamua'ajcaa a'íjma jime' i maj jusi'rii i Dios jimi.

29 Típua'aj sáij tyí'cui'caj, nyáaj nu nya-jta tyi'ijcui'nyij, ajta tipua'aj séej je'ej pua'aj ma'uuriaj tí'ij a'íin ootyá'itzeere'en i Dios jimi, nyéetzij pu je'ej pua'aj naatá'iixaj.

30 Típua'aj a'yan tyuuxié've'ej nyej tyi'táj jin ahuányatzahuatye'en, a'íj nu jin á'nyatzaahuatye'en i tíquee nú'ca'nyisti'.

31 A'íjna i Dios tí ajta vástaria'ra' pué'een i tavástara' Jesús, a'íi pu jamua'reej nyaj quee tyi'tyáhue'taj, tyiche' tyé'tyojtzi're'ej i Dios jusén jime'.

32 Nyati'ij a'áa jo'tyávaaca'aj a Damasco, a'íjna i tajtúhuan i tí jahuiiria'ca'aj i rey Aretas, a'íi pu tyí'cha'iica'aj jo'tij jo'tyényinyi'ij i chájta'naj jitze tí'ij naatyéevi',

33 ajta séecan mu na'cájtoo i sicírij jitze a'ájna jo'tij ja'nácun i tyetyéj jitze, i tí jin curiá'nami' i chájta'naj.

12

Je'ej tí tyi'táj tyu'taséjre i Pablo jimi

1 Capu tyi'táj je'ej tyí'huiire' tí a'táj jusáij óotzaahuatye'ej. Nyajta nyáaj a'íj nu jin tyajamuaaté'exaatye'sij je'ej tí tyi'táj tyu'taséjre nye jimi, ajta je'ej tí tavástara' tyinaataséjra.

2 A'táj nu mua'tyej tí Ciriústu' jitze ajtyáma'can tí a'náj a'yan tyáaruj, pu'ríj tamuáamuata' japuan muáacuj nyinyi'ra'aj á'tyeej tí Dios jútye' yo'vi'tij. Canu jamua'reej je'ej tí tyojo'vi'tichihuaca' tyij jutyévi'j jime' nusu quee, Dios pu xaa jamua'reej.

³ A'íj nu xaa mua'reej ti a'íjna i tyáati', (tipua'aj jutyéviij jime' nusu i júuricama'ra' na'aj, Dios pu'uj jamua'reej)

⁴ a'áa pu jó'vi'tichiihuaca' jo'tíj naa jo'éen, jo'tíj ajta yó'namuajri' a'íjci i nyúucarij tiquee je'ej tyí'rij ti a'tíj jaataxáj íyan i cháanacaj japua.

⁵ I'rúitacaj pu nyaj ahuáanyatzaahuatye'en a'íjna jime' i a'tíj, ajta canu nyajíme', a'íj nu jin ootányatzaahuatye'sij i tiquee nú'ca'nyisti'.

⁶ Ajta tipua'aj a'yan nyetyá'xie'va'aj nyej nyij ahuáanyatzahuatye'en, canu a'ín pue'éenye'ej na'mej síj ti cha'na'aj tyí'xaj, ji'nye nyáaj nu tzáahuatyi'ra'aj jin tyu'taxájtaj, ajta canu a'yan rinyij, ti'ij quee a'tíj a'yan tyí'nyesejra je'ej tiquee tya'ráanajchi, sulu che' a'ín séjre'ej je'ej nyaj ricij, nusu je'ej nyaj tyí'xaj,

⁷ a'íj nu jin á'nyaxíjtye' je'ej ti tyi'tíj tyu'taséjre nye jimi. A'íj pu jin nyata'aj nyij quee á'nyatzaahuatya'aj, Dios pu nye jimi a'yan ty-eetyájtoo tyi'tíj ti a'yan een ti'ij tzícare'ej ti na'ajtyéjtzetyij, ma'ajta a'ín pué'een i tyiyáaru' ti yo'ta'ítyaca' ti'ij je'ej pua'aj náa'uurej.

⁸ Huéicaj nu nyeríj a'yan tyaatáhuaviiri' i tavástara' ti náa'ri' a'íjna i nyaj jin japuéjtzitarej,

⁹ ajta i tavástara' a'yaa pu tyinaaté'exaaj tíjin: "A'íjna i nyaj jin muaxie've' a'íi pu a'ín pué'een i ti a jitze juxie've', ji'nye a'íjna i nyaj néijmi'i jin putyí'uurej a'íi pu huataséjre'sij a'íjna jime' i tiquee mú'ca'nyisti'." A'íj nu nyij jin á'nyatzaahuatye' i tiquee nú'ca'nyisti',

ta'aj ij i Ciríistu' ti jin putyí'uurej nye jimi huatyá'itzeere'en.

¹⁰ A'íj nu nyij jin nyetyamua've' i tiquee nú'ca'nyisti', maj je'ej pua'aj tyí'nyeeje, maj na'náva'vaj, i ti nyamuarie'riste' ajta je'ej nyaj tya'ajpuéjtzij a'íjna jime' nyaj Ciríistu' á'tzaahuatye', ji'nye ti'ijta quee nú'ca'nyisti'raj aj nu nyijta jéetze' huatyényaca'nyej i tavástara' jimi.

¹¹ A'yaa nu tyi'tyínyecha'ij ti'ij túutimue', mua'aj xu ca'nyíjra'aj naatá' nyej nyij a'yan huárinyij. Ji'nye mua'aj xu a'ín pué'een i siaj huatóoci'puaj siaj tyámua' tyinaataxáj, nyej nyajta quee jéetze' ciléenye' jin tyí'huüre' a'íjma jimi i maj va'cán jin tyí'huüre'. Tyij nyajta quee tyi'tíj jin antyínyamua'ree.

¹² I nyaj jin jaapuéjtzitariaca', i siaj jin je'ej tyo'taséj, ajta i ti huápuí'ij naa huasé'rin, a'íj xu mua'aj tyu'séj, a'íj xu sij jin jamua'reej nyej nyáaj ji'récán jime' a'ín pué'een i tavástara' ti nyojo'ta'ítyaca'.

¹³ Setyinaatú'uunyi' tipua'aj nyequee xá'puí' tyajamuaatajé, tyi'tíj pu'uj quee jamuaaci'ij ti'ij tyihuo'ci'ij a'íjma i maj pua'maquéj jusi'rii, a'íj pu a'ín pué'een i nyaj quee a'náj tyi'tíj jin muárie'rij jamuaatá'.

Pablo pu jaxaj ti ajtáhua'aj huóomuaarij

¹⁴ Nu'rij tyámua' huányaruuj nyej nyij nya-jtáhua'aj jamojo'vá'muaarej, canu nyajta ijíj tyi'tíj jin jamuaatamuárie'riste'ej. Canu a'íj huoo i ti mua'ajmaj ja'mua'a'rij, sulu mua'ajmaj, ji'nye mua'aj xu a'ín pué'een i ti a'yan

tyaja'muaci'puaj siaj tyi'táj huo'tá'an i juyójmua', capu maj hua'yojmua' tyi'táj hua'tá'care'en i juhuásimua'.

15 Nyáaj nu nyaxie'vi'ra' jin néijmi'i xijtye'en a'chu nyej tyi'táj tyícha'ij, na'ríij nyasíij néijmi'i nya'huányariej nyej nyij mua'ajmaj jamuaatyáhuüre'en. Ajta tìpua'aj jéetze' nyajá'muaxie've'ej, ¿nyiquij jéetze' sequée che' nyaxie've' xá'ju'un?

16 A'yaa xu tyámua' naa tyá'mua'reej nyej quee tyi'táj jin muárie'rij jamuaatá'. Ajta séecan a'yaa mu tyí'xaj nyaj nu'uj huápu'ij jú'mua'ree je'ej nyaj tyajamuáacuanamuaj.

17 ¿Nyij tyi'táj jin nyajamojó'rie a'íjna jime' nyaj séecan huata'ítyaca' ja'mua jimi?

18 Nyáaj nu i Tito huatáhuaviiri' tí'ij jamojo'vá'muaarej, nyajta séej ta'ihuáara' jamuán huata'ítyaca'. ¿Nyiquij tyi'táj jin jamojo'riej a'íjna i Tito? ¿Nyiquee a'yan tyi'jì're'can jime' tyaj taxa'aj tyana'aj tyi'tyítacha'ij tyajta a'íj tyana'aj tyajta jitze arátaca'nyej i júuricama'ra' i Dios?

19 Tyij sequée a'yan tyí'mua'tzej tyaj a'íjna jin a'yan tyajá'mua'ixaatye' tyej tyij tyu'táta'uunyi' ja'mua jimi, ma' ajta capu a'yan tyi'ja'yájna. Sulu a'yaa tu tyí'xaj i Dios jimi a'íjna jime' tyaj Ciriistu' jitze ajtyáma'can. Ajta a'íjna nye'ihuáamua', a'íi pu tyámua' já'mua'uurej.

20 Ji'nye a'yaa nu tyi'tziinye' tìpua'aj nyeríj a'áa ja'rá'astij, nyajta a'yan tyajamuáatyonyij je'ej nyaj quee tyá'xie've', siajta mua'aj a'yan éenye'que' náatyooniyij je'ej siaj siajta quee

tyá'xie've'. Je'ej pu pua'aj nya'asej tipua'aj xúutya'xi'ij, nusu xóochueeria'aj, na'ríij senyinyu'cacuj, nusu setyúumueeria'aj, na'ríij je'ej pua'aj setyúuxajta, nusu xootzáahuatye'ej, siajta je'ej pua'aj rijcaj.

²¹ A'yaa nu nyajta tyí'tziinye' ti Dios naatatyévi'raste'en mua'ajmaj jime' nyati'ij nyajtáhua'aj a'áa ja'rá'astij, nyajta je'en a'íjna jin huatányaxamuijritye'en siaj mue'tíj seríj á'tyeej siaj je'ej pua'aj tyityetyúucha'ij siajta quee jaatapuá'cítaca' siaj juxana'cire', majta i maj jutyévi'j jin jaamué'tíj i túmii, ajta néijmi'i i siaj jin je'ej pua'aj tyityo'cájrurij.

13

Pablo pu tyihuá'ijmuej ajta hua'tyojtye' antyityáatican jime'

¹ A'íi pu a'íin pu'éen i nyaj nyeríj huéecaj jamúumuarin. Néijmi'i pu a'yan tyá'xa'pui'intari'huan mahua'puaj nusu mahueecaj metyi'séeracaj i tyeíttyee.

² A'íimaj i maj aamí' huóoxana'cirej, majta néijmi'i i séecan, ijíij nyaj ya' imuáj huatyéjve, a'yaa nu nyajtáhua'aj tyihuá'ixaatye' nyati'ij tyihuó'ixaaj nyati'ij hua'puaj jamojo'vá'muaariaca'. Tipua'aj nyajtáhua'aj jamojo'vá'muaarej, canu che' tyihuo'tú'uunyi'raj,

³ ji'nye a'yaa xu mua'aj tyá'xie've' nyaj tyi'tíj jamuaataséjratye'en i siaj jin jáamua'reej ti i Ciriistu' ca'nyíjra'aj nyatá'caa nyej nyij a'yan tyu'taxáj a'íjna jitze ma'can. Ajta i Ciriistu' capu a'yan een ja'mua jimi ti'ij síij tiquee jú'ca'nyisti',

sulu a'íi pu jaataséjrataj ja'mua jimi i ti jin uhuájca'nyej.

⁴ A'yaa pu tyi'ja'yájna ti a'íin óotateehuaca' i cúruuj jitze tí'ij i tíquee uhuájca'nyej, ajta a'íi pu júurij séejre' a'íjna jime' i Dios ti néijmi'i jin putyí'uurej. A'yaa pu cha'taj na'aj quee ityájma tyitú'ca'nyisti' a'íjna jime' tyaj Ciriístu' jitze ajtyáma'can, ajta ityáj tu júurij tá'ju'un jimí, a'íjna jime' tyaj jitzán arátaca'nyej i Dios tyej tyij mua'ajmaj jamuaatyáhuüre'en.

⁵ Siata'aj jujímua'aj huóosej, siaj sij jáamua'reej típua'aj tyámua' naa setyá'tzaahuatye'ej, tyámua' naa setyityahuóosej. ¿Nyij sequée jamua'reej ti a'íin Jesús ti ajta Ciriístu' pué'een ja'mua tzajta' séejre'? Nusu seríj a'íj jin huamué'tichej i siaj japuéjtzitarej.

⁶ A'yaa nu tyá'xie've' siaj jáamua'reej tyaj quee ityáj huamué'tichej.

⁷ A'yaa tu tyá'huoo i Dios jimi siaj sij quee tyi'tíj je'ej pua'aj uuriaj, catu tyej tyij jaataséjrataj tyaj quee huamué'tichej, sulu siata'aj sij mua'aj tyámua' siana'aj tyí'tyesejre'ej, tyij tyajta a'yan huasé'rin mati'íj i maj meríj huamué'tichej.

⁸ Ji'nye catu pújoorej tyaj seequéj tyaataxáj a'íjci i ti ji'ré'can jime', sulu tyaj tyu'tyáhuüre'en a'íjna jimi i ti ji'ré'can jime'.

⁹ A'íj tu jin tatyamua've' i tíquee tú'ca'nyisti', siaj sij mua'aj huatyóoca'nyej i tavástara' jimi, a'yaa tu tyajta tyóoche' tya'huavíiraj tá'ju'un i Dios ja'mua jime' siata'aj sij tyámua' huárinyij.

¹⁰ A'yaa nu anaquéej tyajá'muayu'se'ej meentyij nyequee xu já'muasej, ta'aj ij quee a'yan

tyuuxié've'ej nyej nyij jamuaatamuárie'riste'en a'íjci jime' i nyavástara' ti jin tyinaata'íj nyej nyij tyámua' jamuáa'uurej, capu nyej nyij jamua'antypuá'ritye'en.

Hua'tyojtye' ajta aantypuá'rij

¹¹ Nyata'aj ja'antypuá'ritye'en, nye'ihuáamua', a'yaa nu tyá'xie've' siaj jutyamua've'ej, siajta jahuoocaj siaj sij tyámua'tyi'tyechajcaj. Siata'aj ca'nyíjra'aj huatóoa'an, siaj sij juxáahuaj naa tyityeecháatime'nyij, ajta i Dios ti já'muaxie've' a'íi pu ja'mua tzajta' huatyá'itzeere'ej.

¹² Siata'aj huóotyoytye'en síij ajta síij, xui'tyooopu'í'tza'xi'in a'íjna jime' siaj néijmi'i i Ciriístu' jitze ajtyáma'can.

¹³ Néijmi'i i maj tyá'tzaahuatye', i maj iie'e'ej jusi'rii, a'íi mu yajá'muatyoytye'.

¹⁴ Che' ja'mua jimi huatyá'itzeere'en a'íjna i ti jin tyámua' tyajamuatá'caa i tavástara' a'íjna i Ciriístu', ajta i Dios ti jin já'muaxie've', ajta i júuricama'ra' i Dios, miche' a'íin huatyá'itzeere'en néijmi'caa mua'ajmaj jimi. Che' a'yan tyá'ra'nyij.

Cora, Santa Teresa
Cora, Santa Teresa: I nyúcarij ti jájcua ti a'ijna
á'xaj i Tavástara' i Jesús ti Ciríistu' pue'een ajta
Salmos New Testament+

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

4f03662f-a4e0-5c7c-a13b-0b7002b5b8f6